



Celebracion di cumpleaños di Hubert 'Lio' Booi

“Un fiesta trai ponton....”

.....**DIES** dori a forma orkesta y e fiesta a cuminsa bon. Cu un intermezzo incomodo pa Sr. Booi, kende a sinti su mes malo na cierto momento pa motibo di un incidente chikito, por bisa cu e fiesta a cuminsa y a caba bon. Den un ambiente festivo, un ambiente ameno, un ambiente di amistad, un ambiente cu ta caracteriza un fiesta di ruman, di bisia y di bon amigo. Despues cu Sr. Booi a wordo samina pa profesionalnan cu a bisa cu ‘jarige Job’ ta den bon condicion, e fiesta cu a cuminsa den oranan di atardi caba, a sigui cu e mesun djeitu cu for di cuminsamento. Un poco yobida a hasta trece bendicion pa tur presente. Dignatarionan di tanto Aruba como Boneiro a yega dilanti cas di Sr. Booi pa braze y bise pabien riba su gran dia. Gobernador Sr. Freddy Refunjol y señora, Gezaghbeber di Boneiro Sra. Emerencia, Presidente di Parlamento Paul Croes, varios miembro di Parlamento, Prome Minister Eman y señora, minister Dowers y un publico grandi consistiendo di tur generacion y tur nacionalidad a bin eynan pa e celebracion bunita y unico aki. Tambe por a mira presencia di hopi hende di e mundo di teatro, di e mundo artistico flamboyante yega cerca pa felicita Hubert Booi ,cariñosamente yama “E flamingo Arubiano”.

Prome Minister Eman a califica Sr. Booi como un fuente di inspiracion di asina un magnitud cu tres generacion despues ainda ta wordo inspira dor di dje. “Hobennan ta para riba un escenario y cu animo y entusiasmo ta papia di yotin y bol’i funchi. E ora nos

ta realisa cu memey di nos di un ‘yiu di Aruba’ cu a crea pa nos e instrumento, e palabranan, e musica cu ta transcende di un generacion pa otro. Poco ta esnan cu tin e habilidad, e talento pa por inculca asina profundo den curason di tur for di unda cu nan a bin di cua generacion cu nan por ta, e sentimento di ta ‘yiu di Aruba’”. Eman a pidi y a haya un aplauso grandi pa Sr. Lio Booi como muestra di admiracion y muestra di stimacion. Tambe Eman a pidi Dios pa duna Sr. Booi hopi mas aña di bida pa sigui inspira nos manera e ta haciendo pa hopi aña caba.

Hubert Booi ta co autor di nos Himno Nacional y masha hopi cantica bunita manera “Chanita” y canticanan di e comedia “Amor di Kibaima” y asina por sigui menciona. E titulo di e articulo aki cu un poco libertad poetico ta e prome frase di e cantica “Fiesta den cura”. Algun siman atras Aruba a firma un ‘acuerdo di ruman’ cu Boneiro. Un acuerdo den cua ta wordo conbini pa traha hunto riba varios tereno. Tambe riba tereno di cultura. E acuerdo aki a haya su contenido durante e celebracion aki na unda e pueblonan di dos isla den Reino hunto a fiesta y baila riba e ritmonan cayente di e banda Rincon Boysz. Sr. Lio Booi a nace na Boneiro, pero a biba casi henter su bida aki. Pesey e apodo “Flamingo Arubiano”. Mescos cu durante e firmamento a wapa, e biaha aki tampoco esaki no a keda atras. Pabien un bes mas Hubert ‘Lio’ Booi. Un artista pa excelencia, un homber modesto cu su obranan ta papia e idioma comprendibel pa esnan cu ta stima cultura.

